



SURUHANJAYA PILIHAN RAYA MALAYSIA

KENYATAAN MEDIA

BIL.79 / 2018

URUSAN PILIHAN RAYA KECIL (PRK) PARLIMEN P.132 PORT DICKSON

1. Suruhanjaya Pilihan Raya Malaysia (SPR) telah menerima pemakluman rasmi daripada **Speaker Dewan Rakyat, Yang Berhormat Dato Mohamad Ariff bin Md Yusof** pada **12 September 2018** berhubung dengan kekosongan luar jangka kerusi **Parlimen P.132 Port Dickson** berikutan penyandanginya **Yang Berbahagia Laksamana Muda Dato' Pahlawan Danyal Balagopal Abdullah (B)** telah meletak jawatan pada 12 September 2018.

2. Berikutan kekosongan luar jangka kerusi P.132 Port Dickson itu, SPR telah mengadakan Mesyuarat Khas pada hari ini dan menetapkan bahawa satu Pilihan Raya Kecil (PRK) perlu diadakan dalam tempoh 60 hari dari tarikh kekosongan mulai pada **12 September 2018** untuk mengisi kekosongan di kerusi berkenaan.

3. Bagi maksud menjalankan PRK ini, SPR telah menetapkan tarikh-tarikh seperti yang berikut :

TARIKH KELUAR WRIT	:	20 SEPTEMBER 2018 (KHAMIS)
HARI PENAMAAN CALON	:	29 SEPTEMBER 2018 (SABTU)
HARI MENGUNDI AWAL	:	9 OKTOBER 2018 (SELASA)
HARI MENGUNDI	:	13 OKTOBER 2018 (SABTU)

4. Tempoh berkempen yang ditetapkan adalah **14 hari**, bermula pada hari Penamaan Calon sehingga pukul **11.59 malam, 12 Oktober 2018**.

5. Bagi urusan permohonan undi pos luar negara dan dalam negara, tarikh buka dan tarikh tutup permohonan adalah seperti berikut :

TARIKH BUKA	:	20 SEPTEMBER 2018 (KHAMIS)
TARIKH TUTUP	:	29 SEPTEMBER 2018 (SABTU)

6. Bagi menjalankan proses pilihan raya kecil ini, SPR telah bersetuju untuk melantik **ENCIK KHAIRY BIN MAAMOR** sebagai **Pegawai Pengurus Pilihan Raya Kecil Parlimen P.132 Port Dickson**. Beliau akan dibantu oleh **SEMBILAN (9)** Penolong Pegawai Pengurus. SPR juga bersetuju menubuhkan **LIMA (5)** Pasukan Penguat Kuasa Kempen Pilihan Raya (PP-KPR) untuk memantau semua aktiviti kempen pilihan raya sepanjang tempoh rasmi berkempen.

7. SPR akan menggunakan **Dewan Majlis Perbandaran Port Dickson** sebagai **Pusat Penamaan Calon dan Pusat Penjumlahan Rasmi Undi**.

8. Pada PRK ini, seramai **1,403 orang petugas** dilantik untuk mengendalikan proses PRK P.132 Port Dickson. Manakala sebanyak **39 buah Pusat Mengundi** yang mengandungi kesemuanya **171 Saluran** akan digunakan untuk kemudahan mengundi. PRK ini dianggarkan memerlukan peruntukan **sebanyak RM3.6 JUTA**.

9. SPR juga akan meneruskan penambahbaikan seperti berikut:
- a) Disediakan **DUA (2) saluran khusus** bagi pengundi yang berumur 60 tahun dan ke atas.
 - b) **Memanjangkan tempoh masa pengundian** dari jam **8.00 pagi hingga 5.30 petang** berbanding jam 5.00 petang sebelum ini.
 - c) **Menambah saluran mengundi** di pusat-pusat mengundi yang mempunyai jumlah pemilih yang ramai. Bagi PRK P.132 Port Dickson ini sebanyak **26 saluran baru** diwujudkan bagi mengelakkan jumlah pengundi terlalu ramai di satu-satu saluran menjadikan keseluruhannya adalah **171** saluran berbanding **145** saluran pada **PRU-14**.
 - d) **Penambahan petak undi** di dalam tempat mengundi (saluran) kepada **TIGA (3) petak undi**. Di mana amalan sebelumnya adalah DUA petak undi sahaja.
10. Di samping itu, SPR juga prihatin dengan kesulitan yang dihadapi oleh golongan Orang Kurang Upaya (OKU) pada hari mengundi. Mereka akan dibantu oleh petugas pilihan raya untuk mengundi di saluran yang mudah dan menyenangkan mereka. SPR juga menyediakan kemudahan pengangkutan khas kepada mereka yang memerlukan di dalam beberapa pusat mengundi tertentu.

11. Daftar Pemilih Pilihan Raya yang akan digunakan untuk PRK ini adalah sehingga Suku Kedua Tahun 2018 yang dikemaskini sehingga 11 September 2018. Daftar Pemilih tersebut mengandungi **75,770 orang pemilih berdaftar** yang terdiri daripada **68,486 orang pemilih biasa**, **7,268 pemilih Awal** dan **16 orang Pemilih Tidak Hadir Luar Negara**. Daftar Pemilih tersebut akan mula dijual pada **27 September 2018**.

12. Para pengundi boleh membuat semakan Daftar Pemilih untuk mengetahui maklumat pusat mengundi, saluran mengundi dan nombor bilangan mereka melalui **Laman Web SPR** (www.spr.gov.my) atau menelefon ke talian **03-88927018** atau melalui **SMS 15888** atau melalui **aplikasi MySPR Semak**.

13. Pada PRK ini juga, SPR turut menawarkan kepada mana-mana Pertubuhan Bukan Kerajaan (NGO) atau mana-mana badan yang berminat untuk menjalankan pemerhatian ke atas perjalanan proses PRK ini bermula dari hari penamaan calon sehingga keputusan pilihan raya diumumkan. Mereka dibenarkan untuk membuat pemerhatian seperti di pusat penamaan calon, pusat mengundi, tempat pengiraan undi dan pusat penjumlahan rasmi undi.

14. Selain itu, kepada mana-mana badan yang berminat untuk menjadi Pemerhati Pilihan Raya Kecil ini boleh mengemukakan permohonan kepada SPR. Tarikh tutup permohonan sebagai Pemerhati Tempatan ini ialah pada **25 September 2018**.

15. Bagi menggalakkan pengundi supaya keluar menunaikan tanggungjawab mereka pada hari mengundi, SPR akan melaksanakan kempen `Jom Kita Undi` melalui pelbagai saluran media termasuk di media elektronik, media sosial, media cetak dan pemasangan kain rentang di lokasi-lokasi strategik seperti di tempat-tempat tumpuan awam, hentian bas dan lain-lain tempat yang bersesuaian.

16. Di samping itu SPR juga akan meneruskan kerjasama dengan pihak Jabatan Penerangan Malaysia untuk membuat hebahan siaraya dengan menggunakan van Jabatan berkenaan seperti di kawasan-kawasan penempatan penduduk dan kawasan tumpuan ramai.

17. Bagi PRK ini, SPR mensasarkan **70 peratus** pengundi akan keluar mengundi. SPR juga memohon kerjasama semua pihak termasuk pihak media dan parti-parti politik agar turut mengambil langkah untuk menyeru dan menggalakkan pengundi supaya keluar mengundi pada hari mengundi.

18. Maklumat-maklumat lain berhubung dengan pilihan raya kecil ini akan dimaklumkan dari masa ke semasa oleh SPR.

Sekian dan terima kasih.

TAN SRI OTHMAN BIN HAJI MAHMOOD

Timbalan Pengerusi

Suruhanjaya Pilihan Raya Malaysia (SPR)

Tarikh : 20 September 2018 / 10 Muharram 1440H